

EEFEESUSA

Efeesusa máqusanaasa Pauroofa ákara rúmannimaqóo úfafa.

1 ¹Qinée Pauroosa Ánutuna íriranannai ásauku mundírana Yísunaindi máridaqa, mifá diqiqoo fásiqausa máridaqa. Ánutuna maqásaa fasiqa anaasee Efeesusa máqusai máriasa ásauku mundírana Yísuna ufamau andeeqásee maqee maqee fimariasa ínni maa-akarána rúmannimaqaidaqa.

²Maasá qíkoofa Ánutufa faqa maasá karaambáiqua ásauku mundírafa Yísufa faqa narí áfaarirana faqa narí asooárana faqa ínni nímiani.

Pauroofa ásauku mundíranaki máriasa innaarúnai ámiqi ámiqirana márarufa.

³Maasá dúfi dúfi qírana maasá qíkoona Ánutuna faqa maasá karaambáiqua Yísuna faqa nímiyaqa. Maasá ásauku mundíranaki kéeqafufanoo miná ákoofa Ánutufa ámiqi ámiqirana maasá Yísuna namufaqa qíminau. Mifá innaarúnaindaraa ámiqira dadaaqirana qimaqaifanoo miqóo innaarúnai máridanoo, minára maasá dúfi dúfi qímamaqaidaqa. ⁴Óoqai maa-maqa maaqána sía áuqu kamuqoo faiqí faqa sía máru kamuqoo Ánutufa moómoosa kambíaqa márifandínausakinaana maasá rusandeesámumandee márararee qímaqoosa maraqaisá máridaqa. Narí ásauku mundírana Yísunannai maasá maraqoosá sía áaqarusa máriaqeera nóori kándamasee andeeqárausa máriaqee qímasee maasá rusandeesámumasee maraqoosá máridaqa. ⁵Sía faiqí máru kamuqoo Ánutufa narí áidiranannai maasára maaqímminau, qeeqá qísauku mundíranannai misá qiní faiqi námu qíraamuqmaakai kámmambifaqa qeeqá únannai misá mara quqánauree qinau. Ánutuna áidirafa fúaninnana miqíminoo máridanoo. ⁶Ánutufa narí káaqa qara areenara

áfaarirana narí ámuqusira ámaaku káqi nímimari ainainnara foora káqi nímínau. Minára maasá qímuqusa óokiqari idaaqíra áinaina uqannée qiaqéera káqi nímínau.

⁷Ánutufa narí ásauku mundírana kúqíranannai maasá mandáinainakinaana idukúqiseenoo maasá mandóosana ákiaqara minníqisainaqa márianaura. Maasá minára irisée Ánutuna fira afaariranara akoogóo uqanna máriafaqa qáfamasee irisée náqimasee máraanauree minára rufáida fúrufaridaqa. ⁸⁻⁹Ánutufa narí írirana firaaná faqa qáfeemariana faqa maraséenoo minánnai óoqai márararee qímaqoona maraséenoo narí kukéeqara írirana ásauku mundíranannai aiqáma qímaqoo ainaina ánoonaikianifeera qímasee miná maa-kamúqoo kooroomásee narí faiqi námu áraamummaakaikíranara maasá qímaqíminau. ¹⁰Ánutufa narí kai írinoo andeeqára ákuanee qímasee narí óoqai kambíqaaninna ainainara qímarufa taikáannoo minára qímarufa maaqímmiannoo Ánutufa aiqáma ainainna áuquqoo áinainafa innaarúnai mári ainaina faqa maaqóo mári ainaina faqa óonu maree ani máreeqeenoo moodáanaki quqáseenoo ásauku mundírafa misá níkiaqasaa máriannoo.

¹¹Ánutufa mi-aiqama ainainná narí óoqai fuanée qímaqoomau fídanoo miqídanoo. Ánutufa narí óoqai fuanée qímaqoomau fídanoo maasá narí áiku ásauku máriaqee qímasee faiqí ánaaseeki rusandeesámumandee maasá máranau. Sía káqi miqínau, ásauku mundíranannai kai miná áiku ásauku máriafanausa máridaqa. Óoqai indaarú óosana ároo aukuanna mi-irirána maraqoomáu fídanoo ásauku mundíranannai maasá máraidanoo. ¹²Maasá ásauku mundírana írirana náaree indaarú irisée minára áfeesimariasaa maasá Ánutuna káaqa aréenaranara dúfi dúfi qídaqa.

¹³Ínnee Efeesusa máqannaasa faqa miqíkai íqa máriafanoo. Ámiqira fasaasa ufa innaarúna ásumu márirana ními maría ufana ínnee iriséeqa kúqaa ánoonufee qufanoo Ánutufa narí náaquqara máraquna nímiani qímasoofa ínni nímínoo minánnai naríara útaaqanau. ¹⁴Ánutuna maraquna nímirafa Ánutufa innaarúnai qímianinna ainainnara qíma afeekaikámma útaaqamáqoofa máridanoo, mifá Ánutufa kúqaa mandáinaina ákiaqara rumbáranakinaana idukírana qímiannoo fee qímarifa máridanoo, maasá minára irisée Ánutuna kúqaa aréenaranara dúfi dúfi qídaqa.

Pauroofa Efeesusa máqannaasara innaaru qídanoo.

¹⁵⁻¹⁶Qinée Pauroosa minára iriséeqa ínnee Efeesusa máqannaasa Karaambáiqá Yísuna saqárikiranara irisée faiqí ánaaseera Ánutuna ufa írimariasara rídaqa dadaaqídaqa minára iriséeqa íriafannaqooqari qinée Pauroosa ínniara Ánutufinnai dúfi dúfi qídaqa. Qinée maqee maqee

ínniara innaaru qídaqa, maasá karaambáiqá ásauku mundírana Yísuna káaqa aréenarana ákoofa ¹⁷Ánutufa narí maraquna ínni níminanoo mifá írirana faqa Ánutuna óosana faqa kooroománnimaqáinaqa ínnée minára íriaqeeera innaaru qídaqa.

¹⁸Ánutufa ínni náaramásee narí aréenaranara áfeesiaqee qímarianara ínnée íriaqee qímasee ínniara innaaru qímasaanaqa ínni nífu nitikúra quandásainaqa aréenarana nímiannanara áfeesiaqeeera innaaru qídaqa. Náaquqara ámiqí ámiqirafa idaaqírafa moómoo uqanna narí maqásaa fasiqa anaasee innaarúnai nímirara qíma afeekaikídanoo nímiannoo mináuqara faqa ínniara íriaqeeera innaaru qídaqa. ¹⁹⁻²⁰Maasáki miná ufasaa írirana rusímarioqooqari Ánutuna afeeka fannoo maasáki aináini marínara faqa ínnée íriaqeeera qínée Pauroosa ínniara innaaru qídaqa. Ánutufa ásauku mundírana kúqiranakinaana uqéerasee innaarúnai narí aaqá narí ásauku uqannái óoqumaruqoo firaa afeeka faqa maasáki aináinimárika faqa amana amana kái moodáa firaa afeeka máridanoo.

²¹Miqóo innaarúnai ásauku mundírafa aiqáma ainainasaa úriqaramáfi rakísidanoo, aiqáma innaarúnai úriqararawsa faqa faiqí firasá faqa afeekafaqáasa faqa karaambáiqauqa faqa misáuqa faqa úrinaaqaramáfi rakísidanoo. Mifá aiqáma afeeka nuqu faqáasa maa-maqa maaqánaki máriasa faqa innaarúnai máriasa faqa úrinaaqaramáfi rakísidanoo. ²²Ánutufa aiqáma ainaina maréeqeenoo ásauku mundírana áramandunnai quqáseenoo miná maréeqeenoo Yísuna ufara suqímariasa níkiqasaa quqásaiфанoo aiqáma ainaina úriqarara karaambaiqa máridanoo. ²³Yísuna ufara suqímariasa Yísuna adakára foora máridaqa, aiqámai máriainainafa qumbiqéemarifa narí adakáki Yísuna ufara suqímaríasaki firaaqóo máridanoo.

Óoqai kúqiranaki ubeekoofaqá maqee asumu máriranaki ubeekaqa máridaqa.

2 ¹⁻²Qinée Pauroosa sía Yuda máqannaara qídaqa ínnée ánaamuru máriasara qídaqa, óoqai ínniqa ufa rukíarana faqa áaqarana faqa miqúnna ákiaqara kúqiranaki máriusa máriqau, mi-aukuanná maa-maqa maaqána mandóosanamau kai fímariqau. Ánutuna ufa rukíee maríasa maqee rakísi marí afaannafa Ánutuna innaarúna meerái márifanoo miná ámeemaanai márina, miná ufara eedóo kai qímarusa máriqau. ³Maasá faqa aiqámausa ánaamuru Ánutuna ufa rukíee maríasa naanna rámassee maasá qeeqá faiqí faiqi mandíriranamau fídaqa qeeqá qifaaqa írirana áfaariqa káqi qeeqá mandá didiramau kai fiqíafana. Maasá Yuda máqannaasa ánaamuru naanna rámassee qeeqá qifaaqa áfaaramasee miná ákiaqara Ánutuna áranaqaranaki fíraridaqa.

⁴⁻⁵Ánutufa miná qáfamaseenoo maasára ámuqusirana faqa nífuarafa faqa firaatiá márifanoo ásauku mundírana sáimbaqa maasá faqa

kúqiranakinaana uqéera qiseenoo sía moo áinaina, Ánutuna áfaarirafá kai innaarúna asumu máriranaki quqánniseenoo. ⁶Ánutufa maasá ásauku mundírana Yísunasaa atooárana qáfamaseenoo miná namufaqa kúqiranakinaana uqéeraqiseenoo Yísuna namufaqa Ánutuna innaarúna máriasasaa rakísi nímaqaaqee qifaqa miqóo rakísirausaikiqa márianaura. ⁷Sía Ánutufa fífaui miqínau, narí firaa afaarirana faqa, maasá ásauku mundírana Yísunaki kéeqarana qáfamaseenoo narí firaa aidirana ámuqusirana faqa náaru kambíqainausa uqannífiqarara miqínau. ⁸Sía moo áinainannai Ánutufa narí áfaariranannai kai ínnei innaarúnai asumu máriranaki quqánnisaidanoo, ínnee Yísuna saqárikiranannai áfaaramma nímaqaidanoo. Ínni asumu nímirafa sía ínnee andeeqásee fímarianasaaafau mundídanoofau, sía ínnee ámiqira óosana marasáida kadáapiridee qímarianasáafau mundídanoofau, Ánutuna káqi nímiranasaa kai innaarúnai asumu márirana maasá qímirana uqéereenoo.

⁹Sía maasá qeeqá kadáapiriranannai innaarúna ásumu máraanaura minára sía fífaui maasá qeeqá qimooqíra ufa máriannoo. ¹⁰Ánutufa maasá áuqufa máridanoo sía fífaui maasá áuqínau, maasá ásauku mundírana Yísunasaa atooqáranasaaqari andeeqásee nírana márirana máriaqee qímasee maasá áuqínau. Dóo óoqai mi-andeeqara nirana marirána maasára deedaqammáqoofa máridanoo.

**Yuda máqannaasa faqa ánaamuru faqa ásauku
mundíranaki moodáanaki máridaqa.**

¹¹Yuda máqannaasa óoqaindari náriaráa kai Yuda máqannaasa fáinánduqiraua Ánutunaindi máridee qímasaida ínnei ánaamuruara sía maasá fáinánduqiraua márunnanara áqoosai máriasa máridee qímariquau. Misá fífaui nári fáinánduqiranara qídaqa miqí qímariquau. Ínnee ánaamuru máriasa ínnee óoqai máriunara íriaqa. ¹²Ínnee Efeesusa máqusanaasa ásauku mundíranasaaqari náaduma níanasaa máriusa máriafanoo, ínnee ánaamuru Ánutufa maqásaaqaraasaki sía rusandeesámumánde nariara mároosa máriafanoo, ánaamuru níanasaa máriusa máriafanoo. Ánutufa Yuda máqannaasa faqa moodáanakikira ufa óosana óosana qíma afeekaikíranasaa mundíqa máriusa máriafaqa ínnee ánaamuru sía minakí márusa náaduma níanasaa márusa máriafanoo. Ínnee Efeesusa máqusanaasa maa-maqa maaqánaki máridaqa sía Ánutunara faqa moo áinainara faqa írimariquau káqi fúrufara káimmiqániqau, Ánutuna síaisa máriquau.

¹³Dóo maqee ínnee ásauku mundírana Yísunasaa atooqána ákiaqara ínnei óoqaindari níanai máriusa maqee Ánutufa ínnei rarisámeeqeenoo adeedí quqéenoo, ásauku mundírafa aunírira saqarisaa kúqunannai kai miqínoo. ¹⁴Ánaamuru faqa Yuda máqannaasa faqa namuqára foora

niana niana rakée íqa máriaasa ásauku mundírafa narí kai maréeqee moodáanaki quqáseenoo asooárana maasá qíminau. Yuda máqannaasa faqa ánaamuru faqa namuqáakiqa márufanoo qámbaana faandamura ititánoo márúna ásauku mundírafa narí afaaqannái faandaamura rakée mándoofaqa moodáanaki kiqau. ¹⁵Mooseena sándufakina óosanóosana ainainara nímaarusirana mifá faandaamurara foorá Yuda máqannaasa faqa ánaamuru faqa aiqámaqara rakéemaqoofaqa máríqau. Ásauku mundírafa dóo miná ruká taikásoofaqa mi-atiqandá óonu máree ani máree ásauku mundírana faqa moodáanaki kíqa asooáranaki márídaqa.

¹⁶Ásauku mundírafa narí aunírira saqarisaa kúqunannai Yuda máqanna faqa ánaamuru faqa naríara naríara fídiaqaa ímaruna áru taikánau, narí aunírira saqarisaa kúqunannai Yuda máqanna faqa ánaamuru faqa rákimaruna taikáseenoo Yísufa maréeqeenoo máfi moodáanaki quqáseenoo maréeqeenoo Ánutuna áanóoqirana taikáseenoo narí ákoona Ánutunaki asooáranaki quqánau. ¹⁷Miqí marúnara ásauku mundírafa narí ámiqira asoora fasaasa ufa máree qumuréenoó ínee Ánutunasaqari níanai mária anaamurúsa faqa Yuda máqanna Ánutuna aaqá máriasa faqa qímanniminau. ¹⁸Maasá aiqámaqara Yuda máqanna faqa ánaamuru faqa ásauku mundíranannai kai amaná maasá moodáa maraqunaki aniréeqa maasá qíkoona Ánutuna áfusaa kíkíqianaura.

¹⁹Óoqai ínee moo máqannaara foora ánaamuruara foora máriasa máriafanoo dóo maqee sía miqíqa máriafanoo ínee dóo maqee Ánutuna áiku ásauku máriasa Yuda máqannaasaki moodáa máqanna kámmambi ínee máriafanoo. ²⁰Dóo maqee sía Yuda máqanna kai, ínee faqa máaqara foora usakáifanoo ásauku mundírafa Yísufa narí uqanna faakána miqírafa márínanoo Yísufa niqíqoo fásiquasa faqa Ánutuna tamummáqara fasiqauqa faqa máaqa atunara foora márifanoo ínee faqa máaqa ásaanara foora misásaa faqa Yísunasaa faqa atukaramámbíqa máriafanoo. ²¹Yísufa uqanna faakánara foora márídanoo aiqáma máaqa ásaana afapíta qumárasaifaqa afeekaíkiqa máriafanoo karaambáíqa náaquqara amaana máqara foora usakáidanoo fímaree áimaree innooqáidanoo. ²²Ínee ánaamuru ásauku mundírana saqáriki máriasa faqa aiqámausa Yísunaki máriasa faqa Ánutufa ínni qumáreeqeenoo máaqara foora usakáseenoo narí maraqunannái mi-maqánaki ínniki mári maqafa márídanoo.

Pauroofa narí ánaamuruki saikíranara qídanoo.

3 ¹Qinée Pauroosa minára iriséeqa ínni Efeesusa máqannara Ánutufinnai innaaru qídaq. Qinée ínni ánaamuruara qímannimunnana ákiaqara ásauku mundírana Yísuna rumbáranara foora Roomma máqannaasa rumbáranaki márúnausa márídaqa ínniara innaaru qídaq. ²Ánutufa narí áfaariranannai ínni ánaamuru dadaaqiaqée

qímasee qímunara ínnee ámiqimmandee minára írimariafanoo.
 3-4 Ánutufa Yísunara óoqaindari kukéeqanoo márúnara maqee áukuana
 qiní kooroomáqimaqeenoo. Qinée maa-pasánaki káqikaaqoo minára
 ínnei qímannimiqa, ínnee miná ásaana rúmaseeqa íriqa qiníara ásauku
 mundírana kukéeqara írirana ámiqimmandee íridanoommifoo qifáranoo.

5 Óoqai narí kukéeqara írirana Ánutufa sía kooroo inau, dóo maqee
 narí maraqunannái ámiqira niqiqoo fásiqausa faqa tamummáqara
 fasiqauqasaa faqa qímanniminoo. 6 Miná kukéeqara ufa maaqímminoo
 márídanoo. Yuda máqannaasa Ánutuna ámiqi ámiqiranaki márídaqa,
 Yísuna ámiqira fasaasa ufa fannoo ínnei ánaamuru faqa óonu
 maréeqeenoo Yuda máqannaasa ámiqi ámiqiranaki quqánnisaidanoo. Ínnee
 ánaamuru máriasa maqee Yuda máqannaasa sáimbaqa moodáa nifaaqara
 foora márídaqa ásauku mundírana Yísunakiqari Yuda máqannaasa qíma
 afeekaikámmaqoofa ínnee ánaamuru misá sáimbaqa minakí márída
 máree maríafanoo.

7 Ánutufa narí afeekannái naakáparana akoofásaikirana moo
 qímufaqa qinée minánnai Yísuna ámiqira fasaasa ufa saikíra fáiqikiqa
 márídaqa. 8 Qinée Ánutuna áiku ásauku maqásaa fasiqaki óorudupirausa
 márúnanoo Ánutufa sía minára írinoo káqi mi-naakaparána qíminoo
 diqiqámaqimaqeenoo ásauku mundírana, innaarúnai nímira ámiqi
 ámiqira ainaina moómoo ainaina sía amana ásaana rírana amana mi-
 ufánara ánaamuru qímannimiranaki qiní quqáqisaiifaqa márídaqa.
 9 Ánutuna óoqai kukéeqara írirafa maqee kooroommásee faiqi ánaasee
 ámiqimmandee íriaqera faqa qiní minakí faqa quqáqisaiifaqa márídaqa.
 Ánutufa aiqáma ainaina áuquqoofanoo márufa miqóoqari moómoo
 aukuaana narí kukéeqara írirana Yísunara kísaaqasaa rafáaqafuqoofanoo
 márínau. 10 Maqee áukuana kooroo íanifeera qímasee Yísuna ufara
 suqímariasa misánnai Ánutufa narí írirana quandaqáandidanoo
 uqannífiqaiifaqa qáfáidaqa miná ámiqi ámiqiranara innaarúnai
 ámeemaanai máriasa misá úriqararausa faqa rakísirausa faqa maqee
 uqannífiqaanifeera Yísuna kooroo ídanoo.

11 Ánutufa narí náaru náaru máríranaki márídanoo mi-ainainná
 áuquanauree qímaqoona maqee áuqinau, narí ásauku mundírana
 Yísunannai mi-ainainná, narí ufara súqimariasakina narí írirana kooroo
 íanifeera áuqinau. 12 Maasá Yísunasaa atooáqa máríanannai faqa
 maasá miná saqárikiranannai faqa sía maasá nisaurída ruffaanaura,
 paasóosamasee Ánutuna áfusaa fuannánara mi-eedoo qiráfa maasáindi
 márídanoo. 13 Qinée Pauroosa minára irisée ínnei afeekaikámandaida
 qímannimidaqa. Qinée Yísuna ufa qímannimunaqa misá minára
 fífau qiní karabúsaki quqéeqa. Ínnei Efeesusa máqannaasa qinée
 karabúsaki márúnna aupuraranara iriséeqa sía Yísuna ufa minníseeqa
 kudoosaápaaqa, ínnee minára maaqí qiaqa Pauroona karabúsaki

márirana maasá Efeesusa máqusanaasa ámiqimáqimaqaidanoo fee qímasee asasiaqa.

Ínnee naríara naríara nímuqusiranaki máriaqeera qídanoo.

¹⁴Qinée minára íríqa maasá qíkoona Ánutunara iriséeqa qiqoori sáunarafíqa kummára máfi ínniara qeeqá qímuqusannoo innaaru qídaqá. ¹⁵Innaarúnai máriasa faqa maqásaa máriasa faqa aiqámata Ánutunasaqaraana náriqa núqu uqanna máridaqa. ¹⁶⁻¹⁸Mi-Anutúnara ínniara innaaru qídaqá, ásauku mundírana ínnee saqárikiranannai mifá aniréenoó ínni naunduráki máaqakiara foora ani kéeqáanifeera. Mifá narí maraqunannái narí aréenarana firaanákiqari ínni naunduráki afeeka níminaqa mapukúsee máriaqa. Qinée ínniara maaqí qídaqá innaaru qídaqá, ínnee ínneeqa atukara foora faqa faakánara foora faqa naríara naríara nímuqusiranaki mapukúsaaqa, ínnee Efeesusa máqannaasa faqa Ánutuna áiku ásauku moo máqanna máriasa sáimbaqa afeeka márinqa minánnai ásauku mundírana ínniara ámuqusinoo áidirana firaaná íríaqeera innaaru qídaqá. Mifá ínniara ámuqusinoo áidirana miná kísaaqasaa áidirana faqa miná qúsa kamu faqa miná meerái sandáaqaira faqa miná meemái fárumara foora márirana faqa miná firaatiará íríaqeera qinée innaaru qídaqá. ¹⁹Eeóo ínnee miná ínniara ámuqusirana firaaná íríaqeera innaaru qídaqá, sía amana moó fannoo firaaqóo írinnanoo, firaafá máridanoo, miná ámuqusirana firaafá máridanoo, ínnee miná ámuqusirana firaaná iriséeqa Ánutuna umbiqárafá innikina umbiqáanifeera ínniara innaaru qídaqá.

²⁰Ánutuna afeeka fannoo maasáki saikíranannai naunduráki ámiqi ámiqirana nímiannoo, miná naunduráki dadaaqírafá maasá sía amana minára irámasee qímiannee qianúra sía amana maasá minára írianaúra firaá ainainatiá máridanoo. ²¹Yísuna ufara suqímariasa náriqa ásauku mundíranasaa atooáranannai Ánutuna amooqírafá maqee kámuqoo faqa náaru náaru faqa máriani.

Maasá Yísuna adaká átiara foora máridaqa.

4 ¹Qinée Pauroosa karaambáiqá Yísuna aináini marúnnana ákiaqara Roomma máqanna karabúsaki máridaqa. Qinée karabúsaki máridaqa ínniara afeekaikámandee qímannimidaqa. Ánutufa ínni náaramásooafaqa ínnee ásauku mundírana saqáriki márú kamuqooqari ínneeqa nírana máriranara andeeqásee márianífee qímasee ínni náarama minakí quqéenoó. Ínneeqa márirafa miná amanakái márianifeera qinée qeeqá qímuqusa óokiqari afeekaikámandee qímannimidaqa.

²Sía Ánutufa quqáqoo andeeqárafana minnísee moomáu fuaqa, ínnee maqee maqee sía úrinaaqaraqa óorudupimasee máriaqa, sía áanooiaqa, íreedá kai pisoopísomandee máriaqa sía faiqí ánaaseera qúsa ufa

qímasee áanooiāqa kísaaqasaa íreedá kai idaaqammánnimaqaaqa. Ínnee faiqí ánaaseera nímuqusinanoo nídimarinaqa mifá kooroo íanifee qímasee narínni narínni dadaaqífanoo mifá kooroo íani.

³Ánutuna maraquina fannoo ínni moodáanaki mara quqásaiifaqa máriafanoo ínnikina asooárafa ínni moodáanaki afapíta qumáraiifaqa máriafanoo ínnee miná moodáanaki márirana ámiqímasee rakísiaqa, rakée íani. ⁴Maasá Yísuna ufa írimariasa moodáa nifaaqara foora máridaqa, Ánutuna maraquina faqa moodáa máridanoo Ánutufa moodáa ainainara áfeesiranaki ínni rarisáma quqéeno. ⁵⁻⁶Karaambáiqā moodáa kai máridanoo, Yísuna saqárikirafa moodáa kai máridanoo, amaana námmari moodáa Yísuna áuqusaa kai rúmannimaqarafa máridanoo maasá aiqáma maqa maaqakinaasa níkoofa Ánutufa moodáa kai máridanoo, aiqámausa karaambáiqā mifá kai máridanoo mifá narí ufara suqímariasa aiqáma naunduráki máridanoo aiqámausakiaqa aináinidanoo.

⁷Ásauku mundírafa nímira dadaaqíra afeeka maasá aiqámausa qíminau narí moómoo dadaaqíranakinaana qíminau. Moo dádaaqira afeeka moo fásiqa áminau, moo dádaaqira áfeeka moo fásiqa anaasee níminau. Nimisoofaqa minánnai Yísuna saiká máraaqeera níminau. ⁸Óoqeenáa tamummaqara fasiqa ásauku mundírafa dadaaqíra afeeka qímianínnanara maaqí qímasee ákara rínau.

Mifá rákira karaambaiqara foora máridanoo namuqáa maqúsaki ititásee misá narusée faiqí moómoo karabúsa rumbásee misá aináina faqa indáa mámaree nífiqamaree meerái narí maqúsai óorureenoo narí máqannaasa qímannimifaqa miná amooqiafanoo aináina rainá níminau.

⁹Mi-tamummaqara fasiqána ufa kooroo írafa Yísunara maaqímminoo máridanoo. ¹⁰Mifá narí maqúsai meerái óoru fúnara maaqí qídanoo, mifá náaree meemái maqá ámeemaanai óoqureenoo miqóoqari mifá kai innaarúna maaríni aiqáma innaaruna maarínni óorureenoo narí márirana narí áuqu amana kai márianifeera aiqáma átinai narí írirana narí áuqu amana kái quqásanau.

¹¹Mifá káqi nímira dadaaqíra afeeka faiqí ánaasee níminau, mi-dadaaqira afeekáfa aináinirana akoofásaikiaqee qímasee akaqáusee niqiqoo fásiqausa akoofásaikirana níminau, akaqáusa faiqí ánaasee qímannimirana akoofásaikirana níminau, akaqáusa aamína máqannaasa qímannirana akoofásaikirana faqa paatóo saika akoofásaikirana faqa ufasáa rakísirana akoofásaikirana faqa níminau. ¹²Ánutufa sía fifaufau mi-dadaaqira afeekána níminau, faiqí ánaasee Yísuna ufara suqímariasa Yísuna afaaqara foora afeekaikámasee máriaqeera mi-dadaaqira afeekána óosana óosana maasá qíminoo qinau, ínnee maa-dadaaqira afeekána marasée minánnai qiní ufara suqímariasa afeekaikámannisaaqee

qinau. ¹³Maasá miqímamaree fídaqa maasá kásooqaqee moodáanaki kianáura. Ánutuna ámaakuara írirana faqaa irirana minásaa rusírana faqa miqíananannai mi-moodaanaki kiráfa amaná kambíqaannoo, mi-karí maasá faiqí firaasá íriranara foora máraanauranoo maraséeqa ásauku mundírana firaa irirana amana kái óoru mundúfuanauranoo.

¹⁴Mi-karí maasá sía faiqi ánaaqiara foora aiqáma óosana óosana amaana ufa iriséeqa múnari mínari ianáura únna ufa qímaria fasiqausa nári níkaruqira finnai akaqáusa áaqaranaki rarisáma quqáidaqa maasá misá ufa iriséeqa sía úfaira foora aiqáma saqari udammí udammíanaura.

¹⁵Maasá sía miqíiaqa, maaqíiaqa, naríara naríara qimudáoo qímasee rídaqa minakí márídaqa naríara naríara sía únna qiaqa, ánoona ufa kai qídaqa maasá miqíanannái faiqi ánaaqiara foora ásauku mundírana maasá qíkiaqa amanakái innooqámaree óoru mundúfuanaura.

¹⁶Ásauku mundírafa narí ufa ámeemaanai máriasa rakísimarifaqa misá minára maasá qíkiaqa fee qídaqa. Faiqí afaaqa sía moodáa ainaina márídanoo óosana óosana afaaqa áti fannoo áadu áadu ainaina akoofásaikirana moodáanaki ootúpamáfifanoo moodáa fasiqa márídanoo. Ásauku mundírafa maasá qíkiaqa márifa maasá rakísimarifaqa maasá faqa miqí kai íqa faiqí afaaqa fooqána áadu áadu akoofásaikirausa moodáanaki ootúpanoo márifaqa maasá qíkiaqa Yísunasaa atooáqa márídaqa miná afaaqáikiqa márídaqa. Maasáki aiqámausa náadu náadu náriqa saikírana andeeqásee márídaqa sía naríara naríara níkoqaaani naríara naríara rínnanannai moodáanaki innooqáfinoo ámiqimmandee kambíqafi fúannoo.

**Ásauku mundíranaki máriasa asukunakínaa
óosana taikáfinanoo káaqa qárafa ániani.**

¹⁷Miqí maríanara qinée Pauroosa Karaambáia áuqusaa ínni qímannimidaqa afeekaikámandee kafáa kafáa qímannimidaqa, sía Ánutunara aamína máqannaasa naanna raaqa. Misá írirafa fífau faafaumminoo márídanoo. Ínnee andeeqásee máriaqa. ¹⁸Misá nitikúrakinaa írirafa asukunakí márídanoo Ánutufa nímmari márirana sía misá káqikaqoo máraidaqa ánaamuruara foora sía máraidaqa, misá káaqa írirana síaisa fúrufari maríasa nári qímaqaamáu kai fímariasa, minára kai asukunakí márídaqa. ¹⁹Misá nisaurírana taikárausa márídaqa nári nifaaqa márirana mandóosanai kai ubeekáidaqa óosana óosana nisaurímaria ainainna sía nisaurídaqa fanandídaqa káqi umáraidaqa.

²⁰⁻²¹Ínnee Efeesusa máqannaasa miqíra mandóosana sía ásauku mundírana sáaqaraana íriafanoo, ínnee minára irisée Yísuna áiku ásauku kambíqafufaqa andeeqára írirana faqaasa ínni miná ánoona ufa ínni qímannimiafaqa írimariafanoo. ²²Minára ínnee ínneeqa óoqeenáa márirana nírana fatíka áqusaqaq ínni óoqeenáa márirafa ínniqa maréeqeenoo

ínniqa mandá nikaruqira nidiranaki quqásoofaqa miqóo ínnee ínneeqá kái kurídimariafanoo. ²³Ínni nímuqusaki mandá nidira nidimarina faqa nitikúra mandírira írimariana faqa taikásee innaarúnaindaraana fúka ámiqirafa kai máriani. ²⁴Ínni innaarúnaindaraa fúka márirafa Ánutuna narí miqirafa máridanoo, miná ánoona ufakí andeeqásee márirana faqa Ánutuna ufa ámeemaanai márirana faqa miná amooqirana faqa mi-fuka mariráfa ánoona máridanoo, ínnee mi-marirána kai qamunnará foora afisúsee minakí máraqa nuaqa.

²⁵Dóo minára maaqóoqari sía únna ufa kafáa máriani, taikáani, aiqáma narínni narínni ánoona ufa kai narí qímami narí qímami qiaqa, maasá aiqámausa moodáa nifaaqara foorá kai márunnanara naríndi naríndi márunnanara únna ufa sía qiaqa ánoona ufa kai qiaqa.

²⁶⁻²⁷Aní ánooirafa kambíqafinoo sía aní rarisámeeqee mandáinainaki quqáni, anée ánoo qínana dóo mi-faasaanásaa mi-suanína kéeqarana námufaqa taikáseena faiqáa sía kísaaqasaa ánooida mária, dauní taikáa, Sadannafa minakí kéekafinoo mandáinaina uqéeraandoora.

²⁸Aináina úmmuari mari fasiqafa úmmuarirana taikáani, taikásee quándaki andeeqásee narí aináinamasee narí nárana námasee kudi fasiqauqa faqa náida níminaqa naaqa.

²⁹Sía putaa ainaina áfunda ainainara ufa qiaqa, faiqí ánaasee poodúqamánnimaqaida dadaaqímaria ufana kai qímasaifaqa misá iriséeqa ámiqirana adífaairana márefaranoo.

³⁰Mandá ufa qínanoo Ánutuna náaquqara maraquana fannoo iriséenoo ákooqanoo. Ánutuna máraquna fannoo ínni faqa máriafa Ánutuna ákarara foora naríndi fée qídanoo ínniki ákara rínoo máridanoo. Mi-maraquna akaráfa maaqí qímasee ínniara qíma afeekaikídanoo kásooqaqee Ánutufa qínanoo Yísufa qumurée ínniara qiníndi fee qímasee máraannoo.

³¹Dóo maqee áukuana aiqáma sukáqara ufa faqa qúsufa qímasee dárara qírafa faqa naunduráki mari aanooirafa faqa fatíka áquqa. Naríara naríara firaa kari naméera ufasáa níqimariafa faqa áquraree mariannana faqa sía kafáa máriani naundurákinana naríara naríara fídiaqaa íra írirafa faqa taikáani.

³²Sía miqíqaa, maaqíqaa, naríara naríara íreedá kai nímuqusa reendeénirafa faqa dadaaqírafa faqa máriani, narínni narínni mandáinaina minnísaqa. Maasá óosana óosana ainainannái Ánutuna mandáikammamaqáafanausa márifanoo Ánutufa ásauku mundíranannai maasá dárirana minníqisanau. Dóo ínnee minára iriséeqa miná amana kai dóo ínniqa niqóónausa mandáikamánnimaqarana narí minnísee narí minnísee iaqa.

Ánutufa maasára rírana ámmeemmeriaqa káaqa qárana máraaqa.

5 ¹⁻²Ínnee Eefeesusa máqusanaasara Ánutuna ámuqusira áiku ásauku márianara miná ámmeemmeriaqa ásauku mundírafa maasára

rínoo ámuqusinoo narí márirana maasá qímaaqa maqasée kúqíranaki quqásoofofanoo tatúfira aandau suqára fára foora Ánutuna aikiambú inau, ínnée faqa miqí kai íqa ásauku mundírafa maasára rírana ámeemmeerida naríara naríara ruaqa. Ínni naríara naríara rírafa maqee maqee ínniqa márirana rakísinnimaqaani.

³Ínnée Ánutuna maqásaa áiku ásauku márianara ínniki faiqí ánaasee narí úmmuari narí úmmuari maría ufana faqa ikairí írirana faqa aináinara faqa ánaaseera faqa káaqa fanandí maríana faqa sía mi-oosanná máraaqa minára ufa qímariafa faqa dóo taikáaqa. ⁴Ikairí putaá ufa faqa fúrufarira ufa faqa uteéti qímasee naanaindara qímaria ufana faqa aiqáma sía andeeqára ufa sía ínniki amanaikínoo máridanoo Ánutuna maqásaa áiku ásauku máriafanoo. Ínnée sía miqáa miqáa iaqa, maaqíafa ínnée maqee maqee Ánutunara dúfi dúfi qírafa kai ínniki máriani. ⁵Ínnée maa-moodaa ainainnára kai ámiqimmandee íriaqa, faiqí ánaasee narí úmmuari narí úmmuari maríasa faqa ikairí faqaasa faqa káaqa aináinara rímariasa faqa miqáa qiqánuasauqa, ásauku mundírana quqúsaki faqa Ánutuna quqúsaki faqa sía uqanna káqikaaqóo márefaranoo. Káaqa aináinara rímaria óosanafa mifá moo únna ánutunara innaaru qímaria fára foora miná úfa íri maría fára foora máridanoo.

⁶Minára moó fannoo mi-oosana oosana manda ainainnára aufadámasee ufa qímasee narí fúrufarira ufannái ínni níkaruqímasee mandáinainaki fuaqée qínaqa sía uqanna ínnée miná íriaqa. ⁷Maqee maqee Ánutufa mi-manda oosannára kai qáoo qímarifaqa sía írianannai kai Ánutuna ánoo qirafa misásaa áqufidanoo. Minára qinée ínni qímannimidaqa miqínna fasiqa anaaseesa sía misá faqa máriaqa, níanasaa rufíasee máriaqa. Minára qinée maaqí qímasee qímannimidaqa.

⁸Óoqai ínnée Efeesusa máqusanaasa faqa asukunakí máriusa máriafanoo dóo maqee karaambáifa Ánutuna faiqí ánaasee áiku ásauku kámambi máriafanoo káaqa qárana fooqáasa máriafanoo, dóo minára iriséeqa káaqa qáranaki máriasara foora ída máriaqa. ⁹Káaqa qárafa qáfuqakinaa ainaina ámiqi ámiqifanoo kambíqaidanoo Ánutuna káaqa qáranaki máriasa miqí kai íqa káaqa qáranaki máridaqa misáki ámiqirana faqa andeeqárana faqa ánoona ufa qírana faqa misáki kambíqaidanoo. ¹⁰Ínnée karaambáifa áidi marí máriranara randásee máraaqa. (v 12) Asukunakí máriasa kukéeqaranaki máridaqa óosana óosana mandá nisauri maria ainainna máraifaqa maasá misára qisaurúanoo qímasee sía misá óosanara káqikaaqoo ufa qianúra.

¹¹Minára ínnée fúrufarira márirana máree maríasara faqa asukunakínaa óosana máree maríasara faqa rufíasee ínnée níanasaa máriaqa ínnée misá mandá asukuna maréeqee aiqámausa nífusaa káaqa qára qóo quqásaifaqa mi-manda asukunakí máriasa nisaurírana marasée minnísaqéera.

12 (-) 13 Mi-manda ainaináusa maréeqee aiqámausa nífusaa káaqa qára qóo quqásaifanoo mi-manda ainaináusa óosana uqanna káaqa kooroomámbuannoo. 14 Aiqaama ainaina asukunakínaana maréeqee káaqa qára qóo aiqámausa nífusaa quqásaifanoo mi-ainaináusa faqa káaqa qáranaikiannoo. Minára maasá idí moó maaqí qinóo máridanoo.

Anée faiqée márianafa fíndi fúa.

Kúqiranakiqari fíndi fínanoo

ásauku mundírafa súaniana foora anísaa qáni.

15 Mi-ufáfa miqínoo márinara ínnée Efeesusa máqannaasa ínnéeqa máriranasaa ámiqimmandee rakísiaqa. Sía aamína fasiqara foora máriaqa írirana faqaasara foora máriaqa. 16 Maa-kamuqóo mandá máriira kámu márinara sía fífau súani afu áfeesimarina káqinni áiqaráani, aiqáma faasaanara aináinira faasaanee qiaqa. 17 Minára ínnée sía fúrufariaqa Karaambáiqá ínniara fuaqée qínaqa fífandinnanara faqa áuqefándinnanara faqa óoqai íridanoo ínnée mi-íríránara randásee paqúrimandee mi-maú afeekaikámandee fídaqa qáfaaqa.

18 Ínnée nammári námasee fúrufarirana sía máraaqa mifá ínni kurídimarifa máridanoo Ánutuna maraquna fannoo kai ínni náakufino naundurái qumbiqáfinaqa máriaqa. 19 Ínnée narí qímami narí qímamidaqa Ánutunara amooqírafa ínni naundurái qumbiqáfina máridaqa Dafidina idí faqa amaana idi faqa Ánutunara rara idi faqa mi-idínannai narí qímami narí qímami qiaqa. 20 Maasá karaambáiqá ásauku mundírana Yísuna áuqusaa maqee maqee aiqáma ainainara maasá qíkoona Ánutunara dúfi dúfi qiaqa.

Faiqí ánaaseera qídanoo.

21 Ínnée ásauku mundíránara náaquqee márinara naríara naríara uréeqafi máridaqa reendeená mándee máriaqa.

22 Ínnée ánaaseeuqa faiqí nínaaqmaaka qímannimidaqa, ínnée faqa karaambáiqá áramandunnai máridaqa foora ínnéeqa nifaaqmaaká ufa ámeemaanai miqímandee máriaqa. 23 Ásauku mundírafa narí ufara suqímariasa innaarúna asumu nímmarifa máridanoo, misá úriqararafa máridanoo, ánaasee nifaaqmaaká miqíkai íqa nári nínaaqmaaka úriqara máfi márianara ínnéeqa nifaaqmaaka nímeemaanai uréeqaqa máriaqa. 24 Ásauku mundírana ufara suqímariasa eedóo qímasee miná áramandunnai óoqu mari fídaqa máriandee kai íqa ánaaseeuqa nári nifaaqmaaká aiqáma ufa ámeemaanai máriaqa.

25 Faiqí ínni faqa qímannimidaqa ínnée ánaaseeuqa nifaaqmaaká ínni qímannimidaqa, ínnée faqa ásauku mundírana aanna raaqa, Yísufa narí ufara suqímariasa narí ánaaqara foora misára káaqa ámuqusufanoo misá náaru máriaqeera qímasee narí márirana misára kúqiranaki paasóosamandee quqánau. Ínnée ínnéeqa nínaaqmakara miqí kai íqa

úriqarara ainainee qímasee nímuqusinaqa ruaqa. ²⁶⁻²⁷Fúka anaasee narí afaaqinnái fuanée qímaseenoo afaaqa ánukamáseenoo ámiqira siara qamunna afisúmarenoo narí afaaqa ákumbau fee namúana fee qíkairí fee sía márifanoo andeeqá mareenoo narí afaaqinnái fídanoo. Ásauku mundírafa narí ufara suqímariasa fúka anaaseera foora nammáriara foora rúma nímaqáseenoo andeeqára ámiqiranaki faqa nifaaqa idaaqíranaki faqa maréeqeenoo narínnai ámiqiranaki quqáani fee qímaseenoo maasá narí ufannái nammáriara foora rúma qimaqásaidanoo naríara kai mara quqéenoo, minára Yísufa narí ufara suqímariasara ámuqusufanoo narí márirana misára kúqiranaki quqánau foo qídaqa. ²⁸Faiqí nári nínaaqmaakara miqí kai mándee nári nifaaqara foora nímuqusiani, narí ánaaqara úriqarara ainainee qímasee ámuqusímaríafa narí kai naríara faqa úriqarara ainainee qídanoo ámuqusidanoo. ²⁹⁻³⁰Sía moó fannoo narí afaaqara ákooqaidanoo ámiqimmandee rakísidanoo nárana ámidanoo ásauku mundírafa Yísufa narí ufa suqímariasara narí afaaqafée qímaseenoo rakísidanoo, ínnee faqa miqíkai íqa ínneeqa nínaaqmaakara qiní qifaaqa fée qímasee ámiqimasee rakísiaqa. ³¹Óoqeenáa tamummaqara fasiqauqa ákara miná maaqímminoo máridanoo,

Ánutufa qunára faiqí moó fannoo narí ánoofa ákoona minníseenoo narí ánaaqasaa atooqáfinoo miqandá moodáa kara máfifaranoo.

³²Mi-ufána maa-ainainára kíkiqusidanoo ánoona ámiqirafa máridanoo ásauku mundírafa faqa narí ufara suqímariasa faqa faiqí narí ánaaqara fáqara foora ínoo máridanoo moodáa kara máfuannoo. ³³Mi-ufána ínni faiqíara faqa qídanoo aiqáma fasiqa nári nínaaqmaakara nári nifaaqara foora nári nímuqusiani, ánaasee faqa nári nifaaqmaaká ufa ámeemaanáa eedóo qímasee máriaqa.

Faiquqáindiara faqa nári nínaukoora faqa qídanoo.

6 ¹Faiquqáindi ínniara qídaqa, ínneeqa nínausa níkausa ufara eedóo kai qiaqa. Ínnee Yísuna ufara suqímariasaki maríanara andeeqárafa mifá máridanoo. ²Mooseena sándufara ínnee írimariafanoo minakínaafa aaquqíra ufa qísaukuqara taikásee máridanoo. Minakínaana moo sándufa maasá mi-maú fúanoo Ánutufa moo áinaina maaqóo maa-maqánasaa maasá qímirara qíma afeekaikámmaqoofa maaqímminoo máridanoo, ínniqa nínausa níkausara náaquqaina misá ufamau fuaqa. ³Fífanoo Ánutufa ínniara kísaaqasaa ínneeqa maqa máaqaki máridaqa ámiqiranaki máriaqee qímasee maasára qímafeekaíkinau. Maasá mi-ufánara úriqarara úfee qídaqa. Dóo ínnee faiquáindi mi-maú fuaqa.

⁴Faiqi níkausamara ínni qímannimidaqa sía ínneeqa faiqi fífau nírana fundákifaqa áanoo iaqa, sía miqíafa, maaqíafa, Yísuna ufamau ínni faiquqa andeeqée andeeqásaiifaqa Yísuna ufasáa innooqáafa.

Aináinímariasara faqa misá úriqararausa faqa misára qídanoo.

⁵Qinée Pauroosa ínnee moosá aináinímariasa qímannimidaqa. Ínneeqa feefaurú mārara saikaki kéeqafinaqa ámiqimasee miná aináinammaisaaqa. Sía nifaaqa quqásee mána mána iaqa. Ínnee náaquqee marínaqa aináina ákoona anáinammaisaaqa, ínnee ásauku mundírana aináinidee qídaqa maqásaa aináina ákoona ámiqimasee nímuqusannai aináinammáisaqa. ⁶Sía misá eedóo qíra ufara kai irisée misá nífusaa kai aináiniaqa, ínneeqa nímuqusannai Ánutuna ufamau ásauku mundírana aináinidara foora ámiqimasee aináinamánimaqaqa. ⁷Sía fíffau faiqí aináinamaisera foóriaqa, karaambáiqua aináinammidee qímasee ámiqimasee aináinamaisaa. ⁸Ínnee miqídaqa maanára íriaqa, Karaambáiqua aiqáma fasiqa amana amana kái nímidanoo moosá rumbára saikaki maríasee narí aináinira saikaki māríasee nári ámiqira ainainirana ákiaqara amana amana kai innaarúnai nímiannoo.

⁹Qinée aináinímariasara ínnee ínneeqa aináina ákoona ámiqimasee aináinammaisáa qee qímaseeqa ínnee aináina ákausa faqa qímannimidaqa ínnee faqa miqíkai mándee ínniqa aináinímariasasaa ámiqimmandee rakísiaqa, ámiqimasee aináiniaqee qímasee ánoo írana faqa nárírari māriana faqa taikáaqa. Ínnee faqa maanára íriaqa, ínnee faqa ínni aináinímariasa faqa moodáa rakísirafa innaarúnai mārifa, sía mifá aináinímariasara uréeqarausee qímasee kafáa quándaki rakísi nímaqee maríasara úriqararausee qímasee qaara irirana māraidanoo, moodáa írirana marasée amana amana kai rakísi nímaqaidanoo.

**Roomma máqannaa sundíara foora afaaqa
ititámareena Sadannana faqa rákuuqa.**

¹⁰Maa-ufána taikára ufa maaqímminoo mārídanoo, ínnee karaambáiqua faqa mārídaqa moodáanaki nímarifaqa miná firaa afeekannái ínni faqa moodáanakikirana firaaqóo afeekaikámma mapukúuqa. ¹¹Sadannafa óosana óosana narí mandá níkaru qíranannai ínni náruannoo, ínnee minára rufíasee Ánutufa níminna saqári durú saamunannai ínneeqa nifaaqa ititáaqa. ¹²Maasá Yísuna ufa írimariasas sía faiqí faqa rákidaqa maasá meerái Ánutuna innaarúna ámeemaanai māría mandá áfaanausa faqa rákidaqa, maa-asukunáki māría kamuqoo miríndari rákimariasas faqa misá úriqararausa faqa misá faiqí firaasá faqa meeráindari maasá dárufaqa maasá misá faqa rákidaqa. ¹³Ínnee minára iriséeqa Ánutufa níminna durú saamu saqariná qumáreeqa deedaqída māríaqa. Sadannafa mi-manda faasaanná nárirara aniráinaqa ínnee amanaikíqa māríafanoo narí faqa áruafaqáammasee miqóo kai éeraaramásee ititáqa māríaqa, sía amana áinnaaqaráni.

¹⁴Minára qímannimidaqa. Ínnee fíndifi deedaqída māríaqa Sadannafa ínni mandóosana nimisée náruandoora. Roomma máqannaa sundía

nifaaqa rafáaqaaffmariana kíkiquusee ínniara qianáuranoo. Ínneeqa fausánda níranaqumuki rumbée maría fára foora mifá ínni ánoona ufa kai qírafa mifá máriannoo. Ínni nímuqusasaa ititée maría afeeka ainainara foora ínni andeeqára óosana máriannoo. ¹⁵Ínni níku ititée maríafa níku ánaamuara foora mifá Ánutufa faqa mári asooara amiqira fasaasa ufa maqee maqee aamína máqannaa qímannimiraafa mifá ínni níku ánaamuara foora ititárafa máriannoo. Mi-andeeqara oosannáusa marasáifanoo Sadannafa sía amana ínni náruani.

¹⁶Ínniqa saqári ukéeqirira fára foora Yísuna saqárikirafa máridanoo. Ínnee Roomma máqannaa sundíara foora maqee maqee mi-saqarína ukéeqirisee máraqa nífanoo Sadannafa narí feefa idá muqúru qumáree ínniara óosana óosana fúrufarira irirana minánnai ínni nifaaqa náqusee nárirree qímasee áqusainaqa ínnee Yísuna saqárikiranannai miná máfi rukí áquaqa.

¹⁷Roomma máqannaa sundíauqa rákiranaki fídaqa qafee níkiaaqa afisúsee níkiaqa rukámifooru afisímariqau. Ínneeqa níkiaqaki ititée maría qafeenára foora Ánutufa innaarúnai asumu márirana nímuqa máridanoo. Sadannafa ínni kurídiranaki maqee maqee mara quqárarinaqa ínnee mi-qafeená afisúsee asumu máriaqa. Roomma máqannaa sundíauqa rákira páipana dínni dínni áfaifaqaanannai faiqí ateekeeqa raqúru nímiqa ímariqau. Ínni raiqára páipana aseema fooqáafa márina Ánutuna ufa máridanoo miná maraquana fannoo mi-ufána nímu úfafa máridanoo. Sadannafa ínni faqa rákinaqa mi-samúna qumáree miná áruaqa. ¹⁸Ínnee mi-ainaináusa máraidaqa innaaru qídaqa maqee maqee Ánutuna dadaaqíranara faqa innaaru qiaqa. Ánutuna maraquana afeekannái maqee maqee eendáki faqa fáasaana faqa Ánutuna maqásaa fasiqa anaaseera Ánutufa ámiqi ámiqimma nímaqaanifeera innaaruqiaqa. Sía kudoosaápaaqa afeekaikámandee innaaruqiaqa. ¹⁹Qiní Pauroosara faqa innaaru qiaqa Ánutufa óosana qímasainaqa qinée faiqí ánaasee Yísunara qímannimianauree qímasee paasóosamandee qímannimianauree, Yísuna ámiqira fasaasa ufa oóqai kukéeqanoo máriafa maqee áukuana Ánutufa faiqí ánaasee kooroománnimaqeenoo.

²⁰Qinée Pauroosa mi-amiqira fasaasa ufána aanáiqikirausa máridaqa. Kúqaa Roomma máqanna karabúsaki máridaqa kúqaa aanáiqikirausa máridaqa. Ánutufa qiníara paasóosamandee faiqí ánaasee qímannimianne qifaqa ínnee qiníara innaaru qifaqa paasóosamandee qímannimianauree.

Pauroona ákara taikára ákara.

²¹Qinée Tikikusana aqiqáananoo qiní dáufakiana ínni qímannimiannoo. Mifá maasá qímuqusi marí qikaqaafasaafa máridanoo, karaambáiqi saikáki ámiqi ámiqira ainainímarifa maridanoo. Mifá

qiní fasáasa ufa ínni qímanniminaqa ínnee qiní máriranara íriaqeera. ²²Miná qímannimianifeera aqíqaanáura ínni nímuqusa poodúqaanifeera aqíqaanáuranoo. ²³Maasá qíkoofa Ánutufa faqa maasá karaambáiqá ásauku mundírana Yísuna faqa naunduráki asooárana faqa naríara naríara úriqarara ainainee qímasee nímuqusirana faqa Yísuna saqárikirana faqa ínni aiqáma qiní qíkaqaafasaaúqa nímiáni. ²⁴Ínnee aiqámausa maasá karaambáiqá ásauku mundírana Yísunara sía taikée maría rírana rímariasa, Ánutuna áfaarirafa ínni faqa máriani.